

四庫全書

集部

欽定四庫全書

集部
遵巖集卷二

詳校官給事中臣王鍾健

中書臣劉源溥覆勘

總校官檢討臣何思鈞

校對官編修臣王坦修

謄錄監生臣沈侯

欽定四庫全書

集部六

遵巖集

別集類五

明

提要

臣等謹案遵巖集二十四卷明王慎中撰慎中字道思晉江人嘉靖丙戌進士官至河南布政司叅政事跡具明史文苑傳正嘉之際北地信陽聲華藉甚教天下無讀唐以後書然七子之學得於詩者較深得於文者頗淺

故其詩能自成家而古文則鉤章棘句剝襲
秦漢之面目遂成偽體史稱慎中為文初亦
高談秦漢謂東京以下無可取已而悟歐曾
作文之法乃盡焚舊作一意師仿尤得力於
曾鞏唐順之初不服其說久乃變而從之壯
年廢業益肆力於文演迤詳贍卓然成家與
順之齊名天下稱之曰王唐李攀龍王世貞
力排之卒不能掩也其詩則初為藻艷之格

歸田以後又雜入講學之語顏然自放亦與
順之相似朱彝尊明詩綜乃謂其五言文理
精密嗣響顏謝而論者輒言文勝於詩未為
知音今考集中五言如遊西山普光寺睡起
登金山遊大明湖諸篇固皆遼穆簡遠七言
如每夜猿聲如舍裏四時山色在城中萬井
遙分初日下羣山微見遠煙中琴聲初歇月
掛樹蓮唱微聞風滿川亦頗有風調然綜其

全集之詩與文相較則淺深高下自不能掩
文勝之論殆不盡誣彞尊之論不揣本而齊
其末矣慎中集舊有玩芳堂摘稿遵巖家居
諸刻率雜以少作是本乃隆慶辛未慎中子
同康及壻莊國禎稍為芟削重鋟較為精整
云乾隆四十六年十月恭校上

總纂官

臣紀昀 陸錫熊 臣孫士毅

總校官

臣陸費墀

欽定四庫全書

遵巖集卷一

明 王慎中 撰

五言古詩

郊工頌成也

上親定南北郊之祀乃於國陽建南郊皇皇
乎一代之盛觀王者之大制也作頌成二首
於辟異承序祇德鑒皇天蒼觀文釐元命造哲煥令章諱

臣秉周禮納議光文昌經始揆皇覽測臬卽靈壤巍基
摩地軸層構羅天網營陔三奇積疏陞四維張象形以
初規效運故乘陽躔跂白虎守蚺蜺青龍翔宅嶽既萃
萃傾河亦湯湯縣圃激神嶽蓬壺峙中央啓度非近算
祖烈今有光道存羲軒始典迪夷龍襄維新引有謚作
固亘無疆康哉宜有詠聖謨始我皇

運開信景鑠符籙鋪洪勲重役不成日功資神理存周
畿儉千里茲土直離分無閭控東戶河菑浸南垠星辰

上伾伾日月旁薄噴中天鬱嶽立遙望似雲屯滌室承
東序營奧敞以溫改革錯綺繡弘敷郁鴻紛晶晶列疎
櫺將將伉高門勾陳翼紫宮廣袤縱周垣清激集陽宅
神居軼埃氛瓌瑋增殊觀招揭賁徽文恒濔輦靈構萬
祀永無淪烜烜作者聖率土奉大君

習儀 異典也

南郊工就冬至四日上親勤玉輅習郊禮于
壇上威儀卒度周折咸中小臣從觀其美作

金史卷一百一十五
卷一
異典

芝壇歛浮景休氣郁招清晨旭流翠葆泰風颺華旌飛
龍麗重霄蕤綬在天庭式禮紆皇步篤恭軫聖情几几
碱承舄亭亭雲耀絃秉離臨日鑒乘乾健天行升崇儼
帝對納陞惕凌兢周折並圓方興俛以屏營萬舞羅臯
帳廣樂敷咸莖度以哲罔忒文用道自弘卒事秩無訾
百辟具維刑亶亶不顯德千載揚徽稱

觀牲令儀也

先郊半月奉常奏省牲上親至犧牲所觀牲
焉所以重祭祀率百司潔蠲也作令儀

眡滌周恭祀卜吉漢迓釐於皇寔東塞中孚格無知三
時既不讐言六獸濯以孳靈場冀帝圉御廩仡周圻充人
共繫芻司牧肅來思大牯沃在滌羊豕盈郊坻革鹿既
虞虞置兔亦綏綏降觀移玉輅赫赫交龍旂宰夫脫柢
福典祝奏牲犧牲具靡瘼蠹肱麾咸牲滋展省帝匪康
普存占在茲肆將貴備物和豫肇裡祠

致齋 明禋也

郊祀前三日百官朝服聽誓戒於朝堂上乃齋於文華之殿百司各齋於公所作明禋

享先啓元祀緼豫肅郊禋澄魂愉靚宮貶御抑尚珍沆
瀝羞瓊飡蘭蓀靡文茵赫矣渙王絲咨爾天邑臣受戒
鬱雲會祇詔燦星陳少宰職糾度宗伯蒞其勤秉德思
無射效衷慮自淳修服天闕側濯已咸池津禁闌穆玄
軌省署洽清芬齋心贊皇德率以見明神

演樂 恭命也

郊祀已定禮官奏雅樂未協上乃召張鷟使
典樂且出內藏金鐘玉磬使考校其聲禮官
率奉常詣神樂觀演之小臣與焉作恭命

至樂由陽作出豫肇聲元盡美婉虞簡大雅廢復傳設
業崇繁會樹羽列肆懸執翽侯碩人子野備伶官諧鳳
鳴嶰管希聲韻朱絃始作若焱赴間奏似珠連升歌六
義繹吹律八風旋雷鼓徹靈響雲和發徽彈陳佾奕星

數舞兆郁雲駢信誦五節會終始九變還微生屬休運
肅詔濫朝冠審音德叙辯晞綴景勲宣愧乏延州聽謬
廁洞庭觀

園丘肇祀也

長至日上御法駕臨于齋宮至期舉大祀焉
聖容穆穆天神來格於與休哉作肇祀二首
天閭直夜啓大輅下嶢嶢繁星燦芝蓋劍珮一何炤前
旌龍虎會後御鸞鳳交城人淵伐鼓砰鈞殷鏞韜珠黃

煥紫幄玉英流長旂玄冥承靈蹕百祗欣來朝川后供
明水壁壘司庭燎園壇槩上當泰乙光招搖百辟會有
繹芾烏萃門臯穆穆天子德欽欽肇明郊禮成百代始
律動三辰昭雲亭陋前觀虞柴茲晨紹

練日候有望陰紀回微陽重輪暉紫極五雲昭靈光元
后臨瑤宇庶靈紛翱翔繡裳彰黼黻委珮遞琚璜丹醴
液泰尊潔粢維德香灌流秬鬯旨燔達蘅桂芳中庭羅
廣佾雅奏諧夏英瞻昊四邸奠鈞天六變張佳色翔卿

金上日
卷一
霽休氣鬱穹蒼旭卉仰信對迤迤斯孔享委祉答成祀
不顯況皇章

頌赦 大賚也

郊祀畢上坐殿堂布赦于四方所以敷陽德
廣天貺以對天下之望也作大賚

黃雲擁赤縣朱宮貞瑤光聖皇揚天惠布赦坐明堂茂
辰湛汪澤育物以順鄉黼黻擣宸藻紫泥從天降解作
敷元化在宥喜萬邦舍逆失前禽刑厝釋桁楊黃暉鑒

日竈祥飈颺玄方肆青存虞典祝網侔殷湯神州鬱佳
氣函夏欣乘陽幽崖無匿景槁壤有靈滂稷氣一以盪
休祐駢來穰駘蕩奉帝則極地頌時康

大宴 慶成也

初大宴舉於正月上巳定郊乃以是日行宴
饗焉皇恩流衍神人歡鬯禮于此乎終矣作
慶成

卿日曜貝闕彤霞蔭瑀階執瑁來萬國祀成祝元禧設

樂羅廣殿肆筵臨華墀我客戾有容庶僚咸格茲蘭席
紛並坐鳴珮何委蛇俎折不虛歸杯行豈愬遲烝穀詠
既飽酌卮歌于胥金石邇間作笙簧翕中暉行雲赴迅
節麗舞從風飛下堂集象鞮樂闋竚宸睇鎬飲叶在藻
佳宴厭露斯式衍光有孚終宴敬令儀何以效微衷率
賦定爾詞

秋祀先師恭述二首

維馨歆歲事有恤恭明神豐功報宜重孔祀典尤敦明

明天子命宣哲協欽文咨惟百工長曰予克宅臣攝事
昭我將奏假具惟寅庶僚既濟濟多士亦振振肆佾表
殷薦大烹羞明裡格思儼無斁仰止儀自尊大哉聖人
德展為帝者賓

繁宿夕杓轉皓月璇穹明庭燎晰有輝灌芬鬱以升廣
牡敷孔碩嘉盛登維馨清齊盈金彝和羹薦玉鉶皇皇
旄帔列鏘鏘磬筦鳴脩容羅萬舞雅奏宣九成展禮式
不謏於赫神具寧飄飄紛來宗對越儼相仍伊嘏錫玄

漢王國斯克生

良時嘉宴會 賦公讌也

良時嘉宴會乃在君子堂流雲承芝檻蘭幙徐風揚軒
蓋矚華景倬彼璫璣璋賓筵秩有懼具饗臻時英中坐
交鳴珮微賤慚所將玉醪泛雲罍珍羞充負方蕙盤不
餽歸康爵盈且翔馳光一何速曜靈忽西歲遺志屬蘭
畧瑤膏燦何長駢興瞻具美既醉穆令章顯允哲人德
樂只期之網欽賢符姬旦式衍遵無荒福履永所綏百

歲垂芬芳

遊西山二首

良辰戾首夏肅軫遊西山山形何萃律洲渚亘相綿奔
湍既下赴危峰亦上千鈇鈇石洞窈迤邐飛梁懸朱葩
晞暘谷翠羽蔭陰鬱閼室象霞構疏甍憑風騫抗宇凌
層基列檻俯流泉好鳥揚幽音弱渠濯清漣豈惟耽遠
遊因茲達大觀拾乳歷窳窳擷芳陵嶺岿渟渟出礪淙
靄靄冒隴烟水碧間清藻靈飈出瑤管履險神彌豁入

幽情更延隱巖懷子真蹈海期仲連遺形九州外栖迹
萬象顛崇深惟素秉神理迷真詮遊心迂冲漠斯道庶
不謬

鴟夷從左蠡康樂慕東甌屐泯無續蹤舟沉誰溯流至
人與物化曲工逐時謀疑冰晒夏蟲將隨汗漫遊蛺蝶
既沿澗崎嶇復經丘振袂陟危巘解纓濯澄洲石滑時
藉蘭巖寒或寥樛文芝榮華巔秀穎蔽平疇緣葉藂成
帶激泉夏如璆霏霏雲出岫淅淅飈扶輶旨酒盈瑤卮

臨風自獻醺身已塵象起心與灝氣游緬懷羽化客高
舉不可留精搖生乃勞慾淺道則脩簪紱為鞿縲撫已
竟誰尤

登真覺寺浮圖

寶塔拔地躋蛟龍互拏攬層級凌虛空危磴盤屈曲上
之逼星緯下則俯原壑超升曠我懷頻憩知足弱赤日
耀珠光靈飈響金鐸身高萬象出眇迴二儀廓蒼然見
秦趙微茫辨渭洛風驅燕色來山川翠參錯飛鳥足下

度歸雲衣前落避喧得勝因了淨無真着福庭如可留
吾將從玄鶴

普光寺睡起

群動各有營感感不得息嗟哉尺蠖徒煩塞牽物役豈
謂塵中姿還寄雲外跡古剎絕浮氛法堂鮮來客首夏
澹新涼偃卧不知夕覺來盼高峯近遠各異色草搖席
下芳筠散尊中碧鳥語無俗音泉漱皆冽沚俛仰愜幽
賞去矣從所適

登金山口絕頂二首

崢嶸峙西隅其名金山口拱勢凌玉泉分宗自天壽捐
騎竭獨往宛轉携良友攀石足猶滑捫蘿篠在手回望
目轉眴前首步逾陡及其登層顛諸峯宛相就嵒巖各
殊狀羅列若拱繡晶晶天宇濶俯之何所有入河湧我
前落日在吾右微微見樓閣脈脈分隴畝時惟仲冬交
衆壑已衰朽雖乏芬華敷彌增嶙峋鬬天風颭然下飄
颻吹衣袖丹霞翼素裾白雲生左肘遺形身已僂得意

豈在酒茲山非吾土石室何當構神靈忘窮討蒼茫立
難久

地紀控西界靈山亘北甸足弱步履憩崖峭石猶踐枝
樛乃能援葛脆不可挽當其意象開豈復慮絕蹇瞻峰
皆列巍陟礪數迴緬稍覺天地寬即看雲烟變石竇枝
自榮林罅雪尚泣興濶無近尋登高有遠見周圻矗五
雲易水濺一線微茫燕趙區歷歷皆可辯長嘯發靈籟
倦坐石苔蘚氛垢苟不嬰沉慮斯可遣

十二夜月清甚與張子同翫感述

高旻蕩浮翳仲冬淑氣清涼夜何未央憩坐臨前楹舒
景揚雲端皓魄委廣庭灝英鮮瑤席華彩鑒雕櫺稍稍
風露重微微河漢明眷茲天宇寬展讌諧芳朋撫景遺
俗迫即事寡氛嬰豈惟祛煩積亦以湛心靈戒盈君子
德和光達士情葆曜貞有孚養晦善自名

贈翁仁夫司權河西四首

洵彼南海英識子良在蚤抗志程令猷興文振華藻結

誼值休運投分輸明抱浮歲奄四踰世故多紛擾騏驥
鳴櫪間康瓠以為寶撫事增慷慨沉思亂如搗

思搗子何為遲子音與徽昔子當北翔予方滯南陲
野鬱繇邈荆岑相蔽虧去住猶短蓬相失忽若遺
竭來同朝侍永願承光儀

光儀慰深衷聚散會有渝條風熙自南王事遑啓居揚
旆首朔郊結軫臨廣衢惻愴杯酒間擊祛一踟躕豈曰
無居士非子誰為愉流塵奄忽至服馬遄馳驅

馳驅越河梁河梁何活活憲霽浮雲興浙瀝悲風發出
門慎自愛志士忍飢渴遺欲有貞心秉義無回節臨岐
申贈章聊以慰契濶

贈潘樸溪督學閩州

勉勉周王造耿命亮八荒貢文敷月朏離暉監朱方眷
茲容臺彥作人東海疆卿雲耀紫霄受詔下承明位以
名教超道宜譽髦望閩陬詎匪遯多士良云皇祁祁白
皙集濟濟青衿翔寧好易諄訛紛厖乃厥張亮美哲人

德樂只斯且光徽文蔚追琢修矩穆圭璋秉塞視不怵
登明業自將撥予渥嘉好贈子愧周行

上巳日遊大慧寺后山二首

三月三日英寮展迅薄言命駕遵彼西郊于
時柔陽布和群芳微疎城烟初歛垌風來徐
蘭若象雲而結構崗巒拔地而輪囷遂乃促
膝振衣蕩志盈矚或拂石以嘯歌或憑軒而
徙倚絃管迭御羽觴無數雖節謝詠歸而體

侔齊物昔右軍興歎於蘭亭河陽發詠於金
谷蓋感茂辰之難并悵淑晤之易違也予猥
以樗誕獲從群公率賦短章詞固蕪劣於以
述茲要來未為詭於致乎

雅性遺生迫微尚在幽深聯珂遵城隩肅軫逗河陰春
氣柔且嘉明霽曠遙尋白日麗黃隰惠飈蕩芳林況此
中園丘不異西山岑縈阜上巖嵌攢石下虧嵌覽物易
成趣即景紆登臨陟峻或拆秀乘風時披襟目施睇陽

金匱要略卷一
葩耳夷悅候禽留連塵外侶放浪阿中吟寢痾悵在昨
真蘊愜自今

良時展芳宴乃在西垞園珍木敷丹霞翔雲冠篁竹柔
條紛葳蕤揚萼隨風郁命酌臨疏檻改席俯岑萼薇絲
啓麗節簫箏遞間作烝穀歸不餘馳爵無虛復式教懽
具美迨辰曠行樂不顧好無荒但恐沉曜速神往物俱
捐形遺思自豁令儀欽末要脩矩誓遠服

題陳棟堂詩卷

幽人寔坦坦深心耽玄素久稅箕穎田亦結商丘侶疏
池涌文瀾茂林挺喬樹丹榮彤霞敷繁陰鮮飈貯眷此
商櫟姿復愜濠梁趣放志遺塵蒙葆光湛淳慮飄飄扣
角吟駘蕩乘烟步丘壑有信美紛囂豈予慕得真故後
悴鑒止隨淵注達生取自適永與智者晤

題鈴山堂

鈴山一何峻其下迴秀江洪瀾萃洩洩聳觀鬱崆峒蟠
勢既麗廣降神奧且彰渟淵渙躍虬崇巖毓儀鳳文羽

覽輝集神躅應運驤黼黻摘宸藻絲綸賁天章迢迢美
人居高遐播烈芳阜址俯碧流抗基憑層岡面岑迅鴻
赴榮巘儼鵷蹕嵐翠代堊黝璿源濬圓方白雲當戶生
蘭蕙盈中堂遠色映華薄清音遞瓊璫懿此丘壑姿美
哉輪奐張信矣翬革會謚茲締造艱湘臣蹇好姱衛公
貴苟完承雲結桂棹納景豁芝藥疏繚停夏霏溫房液
冬烟修宇敞楚望輦構永南觀晚卉貝珍嘉遙芬隨風
宣藝荃先鳴鳩列椅竝翔鸞潛鱗濯素波激瀾汎粼粼

九花艷陽室陰隅涌琳泉瑤瑟依綺幌書史充文軒雲
霏應序改縉綽坐相捐靈集名與俱景異致自玄應龍
時興雨澤豹終還山

送王在菴之江西

伯夷惡一世季與鄉人皆君行慕往聖其為柳下儕至
和以飲人順物無安排豈乏涇渭判頽然泯岸崖揆予
拙直姿涉世寡所諧鳥足濫交籍守官幸見偕貌殊同
胸腑言合外形骸大道固難聞明誼良可懷肅肅簡書

畏裾袂臨當乖清霜變灤水落葉流長淮扁舟方大江
渺望不可涯興言託短章投贈愧瓊瑰

章江校士六月十七夜月有作因示諸屬

日入群動息予亦遂休茲稍喜喧濁屏徙步臨前墀仰
見明月出忽與心賞期湛曠神俱王虛明意自宜況逢
時雨霽宿潤含華滋品物各懷榮因得靜中窺始寤玄
寂理寧為躁競知亦有盈樽酒屢進不一持非為莫與
同真賞豈因之

浮涼却煩暑明月流下地清輝濯雨餘皓質離雲際行
失衆星光鑒徹繁陰蔽宴坐及宵分徙倚不能寐欣茲
吏牘闕久已塵營棄淡泊道心生簡編非我累豈乏校
藝長方慚作人智群司肅從事謬以斯文寄如何勗周
行勿云在下位

題憲長賓公所藏張平山畫

居然不出門滿目望巖巒噴泉疑夏冷茂草若冬溫石
罅樹根裂壑底湍流奔飛雲窮昏曉依依在楹軒兩翁

形貌詭御氣而長存不老驚世古無言知道尊徒令好
靜者入室思尋源安知尺幅上墨妙能使然

新理西齋竇晴山顧雍里二僚見過二首

新理西齋居欲便微疾養未能形支離且免事鞅掌榮
階雖接聯下秩自閒冗興至多往來情忘無少長愧乏
盈尊招惠蒙芳駕枉展席隱蓬中開襟當月上清言屢
獻酬永此良夜賞

引領見明月遙從東方吐團團清漢懸隱隱高城度素

節已輕飈新涼稍多露蒼然林外山含景美遐顧情忘
澹空明形骸息喧驚從容攜手懽開獎同心晤耽翫不
知晏爾我自成趣

送劉方伯入覲

皇圖尊中宅江漢宗海水萬國若川奔滔滔流不止列
藩海岱表作牧方千里既奄伯禽封亦踐太公履尊親
與尚功治人臻至理述職固遵期報政亦嗣美會朝四
門闕天王正負宸班位首東方群后何濟濟聰明極遐

廣垂衣穆恭已頌瑞冒分圭褒賢書賜璽天問如從容
念此東人子

劉函山招遊大明湖

輕舟恣所往適趣何必深居然在城郭而得混魚禽翠
岫遠銜席綠波清照襟明湖既得性芳歲亦娛心暮景
媚涵水春風吹滿林岸木稍變色汀草微生陰浩蕩紛
言笑滿盈通酌斟不能日日至勿云樂太湛

遊大明湖晚至北極廟登覽

春城足遐觀攜手復嘉客欲極高深趣停橈理輕策林
木飛鳥還蒼茫烟景夕反照射巖丹遙空帶水碧山色
晦彌明人聲喧更寂燈火起閭閻漁樵散原澤當歌浩
思盈對酒沉憂釋不知驩娛滯天表生皓魄

悔志

早受天刑拘遂耽人爵貴強學思干名樂仕忘竊位結
交託時豪然諾重盟誓祇好朋友懽拙為妻子計約遊
見星趨赴急若飈至掉舌常屈人扼腕獨憤世出言譏

王公慕達不事事傲晚多脫畧嘲慢無嚴志輒希孔門
狂自比周士肆擇術謬毫髮千里遂不啻反躬盡愆尤
考古何乖異多忤豈通方易盈知小器不聞長者言下
流良足畏

行魏縣境中聞縣尹魏君為政之善魏君適以
事他出不及相見作此貽之

天風吹枯蓬我行何悠緬已盡前梁墟還超故鄴甸物
色含人情游目皆可見馬首猶此疆彼界遙將辨芳村

鷄犬聞微術牛羊踐桑棗原上繁麻麥野中遍生厚地
力墾令簡人心勸田間事耕牧老少樂熙晏觀俗感予
心為邦美時彥不覩瓊樹枝空看花滿縣

再至魏縣而魏尹未還賦此奉寄兼以為謝

行役不遑安飄飄同逆旅晨發盱未休僕夫譙相語旱
氣起煩雲驕塵長新暑素衣已盡化揮汗欲成雨名城
暮自投倦翼非斯舉邑吏忽來趨司門不吾禦陰沉華
館靜鵲巢俟鳩處坐享庖廩供水火求輒與竊食慚本

金史卷一百一十五
心愛此民性古再至已如歸轉憶東道主

貴溪贈江貞齋學士

跂予懷夙心願言見君子抱此未能降光儀違覲止祇
役出名邑及君在桑梓攝衣升高堂弭駕依仁里蘭室
盈芬芳下風吐詞旨敷文比霞郁馳辯若流水大智問
下愚冲襟忘末齒謏聞謬見推狂言不予鄙昔人傾蓋
談今日諧斯理新知信可樂投分從茲始

遊白鹿洞

素嬰丘壑情況稟英賢想寤寐懸宿心遊盤得茲賞重
陰始晦蒙蒙杲旋開朗攬勝據巉巖探奇歷榛莽境閑
百慮空意愜二儀廣野色淨巾衣秋容成物象菊含露
下英泉作山中響柔葉稍朝零剛條非夏長景光易流
徙今古同俛仰躊躇悵回軫何時還獨往

白鹿洞書院

昔賢敦雅尚設教託靈壤妙得高深理非闕山水賞道
因名勝尊神以流行養時去跡空留風存化猶廣宏基

茂草餘巍構浮雲上無事鳥頻飛有懷予獨訪林芳鬱
紛數庭木自成長泉石有餘清絃歌輒遺響川水逝如
斯山形高可仰徘徊西日斜惆悵前人往

六合亭

亭宇憑虛空結構出妙境攀援藉葛藟毫末凌光景豁
達四天通夷猶雙目騁雲生當正襟風起吹方領泉脉
散千峯湖波澄萬頃烟霏自開歛魚鳥各翔泳即事天
機深忘言外物屏始知世上日不比山中永

高美亭懷徐少湖

林麓莽蒼蒼亭幽人獨上
縈迴瞰巖岫沃衍觀田壤
嘉卉散異芳珍叢發新爽
微陰益峯高始霽壯泉響
跡羨魚鳥閒心忻草木長
不諧意所欽終未極茲賞

德興縣公署

開門日無事蒼然嵐氣入
瀑泉流向城山鳥鳴在邑
公室剪茅茨土階無等級
閑曠慚使職淳質見民習
几案簿書空輿臺端拱立
馳驅何以慰時雨潤原隰

遊麻姑山

雲出本無心擇棲多奇巘類予慕真勝涉趣不知遠初
緣碧澗行幾傍丹崖轉林追去虎蹤蹬躡飛猿踐泉流
逶淺深巖谷變陰顯漬瀑遇留憩石床時仰偃桂芳洞
裏秋霞映山中晚採異尋前期入幽忘後反神遊力不
惓理愜情俱遣天路如可梯欲以微官免

仙都觀

吾生罔象求飄忽御冷風舉足踐元氣天門見開通美

哉不死庭觀闕何嚴崇琪樹敷珍葉虛空出葉宮仙人
初降止鸞鶴紛來同頽霞晃裾袂二曜明兩瞳玉體垂
一臂接我游高空手授玄簡文跪讀未及終倏值衝焱
過吹墜綠雲中恍若形骸喪俄頃還舊躬因思在人世
擾擾如鼠蟲

仙都觀午食

世人安美食日日事甘芳豈識有真士食和吸瓊漿珍
肥祇腥臭粱稻如糟糠未能絕世緣形為調饑妨雖不

貧外味猶欲飽中腸炊烟借丹竈載七升石牀茲愧小
人腹難期辟穀方

贈饒州張明府汝思

出守君建侯來旬予濫使相逢職事頃獲展平生契輿
誦聞載途成功皆可記愛人百骸勞折獄一言費田野
鮮諍畝公庭無留事鄱水郡前清芝山郊外翠金牛目
已空害馬心能制庇善如穀養去邪類獸薙特立好奇
節平施忘小惠既多忤俗情復少悅人智迂謬同素心

感慨興昔志雖匪觀風者庶以告在位

饒州閱武贈屠兵備

桓桓使者居扼楚復持越割鎮山水邦並提虎龍節廟
畫用老成戎機資明哲指揮不須臾頓使精采別好整
兼多暇教民方大閱中軍雷鼓動前表帛旌揭馳驅馬
足齊坐作人聲絕草木助行威魚鳥皆成列千屯知擊
刺四境無盜竊風靜鯨鯢波氛收豺虎穴從容尊俎間
談笑外衝折予本好奇策當歌生壯烈

餘干道中寄懷江午坡僉憲

湖水日夜綠輕舟隨沂沿肅肅賓鴻羽命侶悲楚天征
人正盈抱坐使憂思牽所思何為者我友阻良緣昔望
濶音容幾經芳歲捐緘素詞難極馳情間山川今來接
面目曾不須臾間四體為人役從事嗟獨賢倉卒執杯
酒沾唇不下咽新篇何由覲妙理未及詮宿懷如糾結
待子解其纏乍見翻違去持此竟莫宣

寄江少峯評事少峯見枉贈章聊爾奉答兼申

後期

相期千載餘忽覩一言合玉振發芳詞銀鉤灑妙札枉
擲重兼金舒卷常在榻把玩再三過離思千萬雜征途
日向西撫景歲將匝舊酒憶宵持新裾遲春拉莫言緩
報章高韻難為答

曉發南康

簡書委陋躬徂鞅戒侵旦徒御帶寒色初鷄響空館城
魚鑰聲開郊隼旗彩散明月稍低山疎星猶在漢喙息

方自歲棲禽亦未轉因茲風物情彌切勞生嘆

宿東林夜月

等是諸峯裏到此居然別蓮池鑒淨心竹徑疎玄髮前
嶺斂浮雲中天吐華月輪浸千流滿鏡懸萬景滅魄豈
緣朔生光非從夜發仰視步庭中一與山僧說

侯民部靜溪招遊甘棠湖陪憲使管復齋諸公
積雨夏陰生瀾漫湖水遍悔為一室拘幸逢方舟宴遠
嶼微出江雜芳正盈旬沿流始沂洄逗浦更遊行樹色

逐橈迴波容隨望變放情魚鳥間景晨不知晏雲氣輕
嘉體蘭觴易酬獻一杯已可歡況以偶時彥

宿東林寺雨

稅駕託精廬入門微雨作稍聞響前山還看度高閣霏
霏雜桂烟瑟瑟寒風鐸潤益香水生散為諸花落過林
悟本空行天覺無著能令執熱人歆鬱忽如濯

聞移官報至示舍弟道原

孱蒙自弱齡幸稟嚴慈誨束髮通朝籍辭親千里外猥

金匱要略卷一
持小器資不克大車載好近為善名頻復多言悔求全
易生毀過涉因懼害虎尾獲安寧鷄鳴興怨艾浮雲始
悟輕遲日深知愛將乞簪笏投歸奉垂堂誠矢志未及
伸新恩來至再金馬忽奔投九重羽檄逮渥哉寵命臨
敢云稍懈怠

題朱文學萬峯讀書所

築室向深山群峯莽迴互紛紜不可選舉萬當盈數甕
牖嵐氣蒸桑樞流水注一室豈不拘所欣在竹素圖書

左右陳日與前人晤上窺乾坤倪下覽霸王驚胸臆恣
鑽搜仵仵窮昏曙形遺同槁木意豁懼披霧此樂將永
年終身堪閉戶時人那得知頗用譏頗固

宿靈源禪院

拘拘有妄身一一不能捨形骸自束縛日使道心寡偶
同片雲閒得此憩蘭若奇峯千萬疊一派飛泉灑颯颯
天風來松聲如雨下冥濛衾幃深烟靄翠盈把不滅慧
燈懸照茲四體假始知房闥卧息偃類奔馬誓欲託名

山於焉投靜者荒茅便可芟無為俟聊且

洪芳洲養疾山中惠訪草堂因而留館

裊裊桂樹枝涼風日將變生色難久留華光苦流轉夫
君如不來何以慰偃蹇今夕良何夕悠然適我願片雲
本在山出岫亦游行吾園雖蕪沒物氣皆疎遠以茲城
郭深豈必山林善開軒散煩促憑楹息步踐新飈起草
頭白月浮池面蕭閒秋正初徙倚夜方半君自所好殊
疵吝何足眷

談十山年兄枉訪叙舊卒然迷懷因以為贈

釋褐記叨宴曲江柳初綠吾鬢矜似鴉君顏正丹渥日
月何其駛崩迫類轉轂藹疾屏郊居蓬藿森成束何意
擁傳榮翻然賁愚谷鷄犬疑組纓駟呵恐僮僕相見若
新懽握手競瞻矚容色已非故交態猶在目開口長河
傾稍稍悉胸腹駭甚遊世機追數畏途躅功業存憂患
形迹混寵辱南徙邇瑯島西行窮涪蜀由來材具大細
巨無不足多閱時務深涉險道情熟行年未清艾令德

懋前勗披晤解悃勤側聽知蘊蓄踟躕歲寒心繾綣問
幽獨文園可戲娛策勲在簡牘鳬鶴有短長勿用強斷
續君其茂竹帛吾當守松菊

送談十山公廣東左轄

文昌星象動移轄向百粵國事倚財用天心生俊傑盛
年好策勲陳力在高列閭里苦疲瘵軍須復置竭時變
資兼濟權機難預設恢宏文武安出入霸王說高屋建
瓴水何當喻敏決千牛解崇朝硯刃猶新發受才正爾

殊處地值方蹶瓊海揚沸湯桂嶺長蛇穴五材誰去兵
峒箐常流血負弩煩諸侯行路多持鐵官邪乏糾摘綱
條日隕缺一岳勢已尊四維賴手挈豈徒酌泉心不愧
飲冰節妙畧神弛張坐制蠻夷謁丈夫異草木身名惡
漸滅功烈勇自致金石窮治伐餘事取富貴斗印肘間
紕請看歲荏苒容易凋華髮

遵嚴集卷一

欽定四庫全書

遵巖集卷二

明 王慎中 撰

七言古詩

春陰長句次李司封古冲韻

冬令春行節序殊
衝泥立馬歎窮途
勞思江國傷蕙杜
旅食京華改柞榆
碧動沙光歸雪篠
青殘雨色入平蕪
閨人弱線脩春服
禁草徐風搖夕鋪
暖閣遷鶯稀逢友

定巢新燕故將雛西風爽氣來天地北闕浮雲定有無
世事自憐隨省騎吏情真擬問漁徒燕城物候催遊子
伏枕閉門肺病蘇

功德寺

我昔已聞功德寺山遊日暮行始至舊栽松柏森成行
庭空寥戾鶴孤唳魏碑古趺苔半封上有金鑄護勅字
巖巒長圍龍虎宮棟宇猶帶金銀氣老僧告我昔年事
令我感歎長欷歔宣宗昔日盛行遊四海晏然邊塵收

鑿嵌構宇俯喬嶽穿池引水開滄流慈雲覆頂翔赤鳳
靈山繞勢蟠青虬萬乘時來過雷電郊原旖旎閃黃旂
御前一一侍玉女鳴璫曳珮凌清秋危閣感沓象緯逼
長廊丹碧辰星留綺繡參錯開荷芰華芝翠葆翼龍舟
汾水具茨存至理國有元氣敷皇猷靈湫龍去已茫然
此地即看非昔年繡野平原芊草合御堤曲圯洑波濺
誦經釋子四五侶法鼓振響揚芳烟梧月落梁淨梵色
松風撼戶韻清絃吁嗟陵谷須臾改何況世事多變遷

君不見素旗颺颺下靈車
神來應與群帝俱玉殿金燈
夜有無

送陸毅齋守撫州

薊門二月芳草深君侯兩服驟駸駸
英寮飲餞開蓀宴如澠之酒攢華簪
柔楊青青不受折欲別不別愁人心
長風漫度青驪歌林端黃鳥聲相和
憶昨與子諧嫵婉瓊樓珠宿森羅翠
帳晴吟紫芝苑芳郊曉並玉花珂
天地百年交不足弟兄四海懽如何
聖朝禮樂興寓縣

尚書曹中皆妙選楚璧朝揚畫省輝岐鸞暮翥文閭綯
專對清綰赤銀章獨誦榮登黃金殿九夷七戎同文軌
四門萬里秩賓獻茂辰相見眼盡青展采振藻何英靈
握中一尺玄璆璞腰間雜佩蒼龍精角巾往往探奇字
曲几時時問譯經揮翰彈碁樂未極縱酒憂天常不醒
金谿之城半山谷君也分符下南國雲間初賜五馬車
風裏遙飛雙霞鳥修途不礙驂騑驅丹心終見豚魚格
吹枯噓朽回昭融艾鋤要使雷霆擊人生聚散何能常

一旦繾綣成參商賢豪得路各努力同心豈必俱同行
醉餘拂拭操珠徽回飈倏忽高雲翔桂槳夜發遲冰泮
蘭珮春生去路香君不見匡廬峰洞庭水巨靈巖嶮東
南峙沍波簸蕩絕塵滓潢汚崕嶮徒為爾丈夫意氣亦
若此

送張以學尹諸暨

張郎衝星辭燕闕素紉朱芾過我別頭上我冠高切雲
腰間長劍光照雪自言將下扶餘邦鑑湖天迴雲霧光

王喬鳬鳥青霞去宓子珠絃白日揚感君別促傷會希
羽觴桂酒傳若飛鳴鳥在林求其友征馬出門不斷嘶
丈夫抱璞不自銜燕石竟迷鄭客盼朱瑟工操不受竽
明珠暗投反按劍世路衣狗蒼黃分天風搏翮浩蕩變
竹林不遲彩鷗馴枳棘難淹文鴈絢君去飄飄碧海春
予住栖栖錦里塵扁舟為過剡溪曲定憶當時鼓柁人
題王給事南庄乃翁詩卷

南極徵君長濩落獨傍雲峰結茅屋白日滄浪唯嘯歌

青天翠壁踟躕躑一從雲掩少微星綺幌蕭蕭虛素楹
秋風出戶鴛孤咽落月在梁鶴自驚惟有南庄倚桐樹
香葉年年雛鷓鴣

贈丘集齋侍御督南畿學

繡衣使者復欲東朱軒露冕驂青驄絲鞵游環玉宛轉
文韞刻璫金玲瓏刷足朝辭燕甸雪嬌嘶曉度潞河風
潞河春風萬楊樹塲藿離離維不住桐柱調促聲正悲
桂醕杯乾日空暮西臺纓烏切雲日珪龜環村君第一

觸邪鬼稱獬豸冠持橐雄簪螭頭筆素擬勛業青冥上
九關虎豹畫相向夷龍許已真自知堯舜匡君誰能讓
萬言未獻賈山疏七貴爭避桓典路對酒長懷杞國憂
扣閤每值丞卿怒憐予滯淫獨繫官與君歡覲常問玄
鐙月秋看琴觴接雨雪不嗟徒馬煩投分結契為弟兄
開襟促膝頻相仍長風吹蓬無定蹤彩鷁縹緲之金陵
金陵自古稱佳麗霧直雷濤蟠王氣高皇提劍造天功
奠域肇封彌萬禩玉京龍虎互盤結貝闕星辰森虧蔽

浩蕩人文中宇殊赫艷聲名南州會王阮風流今尚存
陸謝詞華異代繼紫薇飄飄下丹勅鸞翔鳳翥無儔匹
錦繡山河揚憶行烟花甸服懸鑒入奎宿當宵垂象輝
劍光貫斗連牛拂漢南獨步鮮克企披華啓秀徒為爾
百朋濟濟詠菁莪千溪粲粲繁桃李弔古高吟六苑春
朦遊清飲三江水臨岐贈別何所歎贈子雜珮雙琅玕
揚波激濶窮溟滓挽頽障倒迴真源莫教琳球羨希絕
要與鍾鼎齊嶺岼

郊遊道中風寒甚

風寒瑟瑟吹我襟馬尾直豎蹄難任
前瞻功德寺名物色

杳還顧靈藏寺名鐘聲深萬山松桂淒淒落更有飢鴉啼

檄檨僕夫威遲號無衣客子蕭騷戀行樂

雙榮壽歌為龔內翰賦

南極之星應壽貞拱辰映斗精熒熒老人竭來瑞瑤京
駢虬翳鳳闥風行琪林瑤海娛長生紫誥煌煌迴鸞光
玉堂仙子雲錦裳合歡獻壽樂哉康

登山險絕已非人境遂賦遊仙招隱之歌遊仙

歌

今我忽兮不樂駕言遊兮名山陟巖岫兮崆嶇躡絕頂
兮巔岼烟霏霏兮雲在下信斯美兮非人寰山中之人
兮冰雪顏沆瀣飲兮瓊膏飡神炯炯兮霍耀膚綽約兮
流素丹糝瑤藥兮翳文芝餌五朮兮珮華管駟玉虬兮
馭鳧鷖鳳凰翼蓋兮翔文鸞宓妃嬋媛兮后乘豐隆屏
翳兮鬱以承鑾紛飄飄兮下御倏往來兮山之間闔天

閨兮延予啓玉粲兮嫣然導予兮元秘授予兮靈詮揖
洪厓兮為侶快執袂兮偃佺蛄浩蕩兮高舉極玄圃兮
閨顛超溟滓兮若視遺龍蠖兮空筌

招隱歌

有一美人兮山之幽構雲阿兮建霞旂結蘭簟兮桂櫟
巢荃紉兮擷荷裘壑岑峇兮嵒嶠路逶邐兮阻修迴素
湍兮百折激清籟兮靈湫紛異卉兮冬榮枯木鬱兮枝
相樛流雲屯兮飛蓋漱瀏泉兮琳瑯飄風赴兮層曲薜

荔曳兮堂之坳鳥在戶兮嚶嚶鹿鳴除兮呦呦虎豹
兮晝夜群鹿豕兮遨遊捐余珮兮河干縹余馬兮椒丘
懷少室兮真隱慕谷口兮靈修噍簪笏兮徽纒託泉石
兮好仇永從之兮不返與達士兮為儔

秋夜篇

繁宿依天夜未央瞰月垂影鑒我床厲風舉帷露沾裳
惴惴不寐循東廂哀鴈流影之何方攬衣屏立以徬徨
明鎰熒熒爛夕堂朱絃泠泠揮素商美人對之心不忘

不覺北斗低西方繁銷芬歇誰能常努力懋德競流光
蟬貼在戶啼未安庭鶴警露當夕寒草木變衰凋玉顏
晚有蕙兮臯有蘭霜黃沙白日摧殘含嬌抱郁只自歎
盈盈織女濯雙蛾虬襄蜺揚熾姁牽牛耿耿阻明河
河深欲濟水增波望而弗覲時匪多追歎戚別涕若沱
壯遊篇贈莊君采捧郊詔入蜀

南風其徐大火流飛鴻鳴鳥聲相求勸君置節且莫歎
聽我撫觴歌壯遊六轡如絲子所持壯遊萬里自茲始

聖皇穆穆開虞聰昭代濟濟崇周禮天明地察隆祀典
睦族展親敦令豈玉牒千年奉至尊金章八道馳行使
黃封朝下明光宮輜軒夕度瀘溝水益州鳥道接秦川
隴坂緣雲高挿天辨方藩肇蜚輶域經野星分井鬼躔
駟馬橋連清渭曲太白標絕峨眉顛洶淙巖石互盪瀾
懸梯斷棧相鈎連丞相廟深老栢裂子雲亭古蒼苔芊
此去先登泰華峰巨靈廟曩與天通滄波夜瀉魚龍靜
薜荔秋封鳥鼠空百年關頭長濤浪九折盤西夕雨風

始信猿聲墮客淚遙憐巴唱引行轡皇皇帝命遐荒歡
朱門香裊輕烟寒捧詔日高紫氣繞上殿風引鳴珂珊
蜀王秉禮拜手讀谿老喧呼扶杖看過秦論擬觀風著
劔閣銘應覽勝刊迴舟好過灩澦堆巫峽秋濤日夜來
瀟湘竹密湖光動濯錦帆張江色開作賦還投汨羅畔
題詩許上望鄉臺蒼梧氣遠不可叫白帝城孤空自哀
君不見成都當時羨相如諭蜀文高輝駟車子長歷覽
浮湘水歸來乃有石室居故知壯士之志在四方睢睢

盱盱戶庭不出非丈夫方塘子自矜意氣彌宇宙天路
雲遠不足登要使聲華滿人口祇今天子勤延竚持歸
報答何所有去住萍蹤豈足知我歌壯遊君莫疑

河西歌送崔副使屯田甘肅

漢家四葉當用武南威百粵北平虜候月九天出旆旌
揚塵萬里鳴鞀鼓斥境先闢新秦中畧地還臨舊幕下
王幕以南寇不來邊臣主議開河西兼符使者乘輅出
兩道將軍挿羽齊築堠列亭過谷蠡建旄授節戍渠犂

渾耶納款壯邊衛大宛銜恩輸國質天馬效鳴上苑驂
眩人貢伎中軍戲烏孫乞為塞外藩單于長失右方臂
河南五郡富且雄控扼婁羌攘犬戎生兒十歲能騎馬
選士千屯皆引弓遠卻匈奴深避帳覽威諸域畢承風
葡萄移種入蘭殿苜蓿連陰接桂宮博望鑿空要上賞
貳師善戰啓侯封武帝居然弘茂畧秦皇不得誇奇功
原野蕭條年代改昔時亭障依然在崙頭田官沒草萊
密須征旅愁關壘天驕遊獵蔽陰山誘罕邀遮蠕瀚海

丈夫報主兼立名慷慨辭君塞上行屬國應瞻都護節
居延再起受降城歸來拜手見天子成功元是一書生

古從軍行送陳中丞出塞

漢家關塞盡黃雲置壘張亭迥不分乘月長遮奪朔地
防秋未解戍邊軍征成年年長城下旗旒紛紛大朔野
邊騎朝騰萬里昏燧烟夕起群峯赭玄漠警急傳消息
單于屯在居胥北颯沓風翻瀚海波陰沉雪晦天山色
檄書插羽疾流星將軍膏劍事戎行芒動九旂新拜將

符飛五道遍徵兵宣威校獵長楊館勞率親臨細柳營
六郡良家善騎射三河俠少本忘生鳴笳遙向金微道
蹀馬誓貪鏃勒銘遊擊更番驃騎伍奇邀偏領輕車部
武陽壯歲慣殺人去病辭家專報主七尺湛盧勒宿揮
千重渠答雜沙注左賢諸落發烏孫前軍轉戰越樓蘭
蛇蟠結陣祲氛黑虎哮合圍日暈寒一生酬遇便輕敵
百死樹勲不避難隴水分愁晝夜咽鄉心盡望關山月
煮糜時斧黑河冰卧毳尚濺朱輪血狼塞蕭條蘆管悲

鸞閣迢遞帛書絕軍中苦樂只自知戎衣第問所從誰
天子憂勤思振旅丈人行險用貞師旄頭蝕應平戎日
燕領封當破敵時但決幃中千里勝不妨代北六月歸

潞河客舍別蔡刑部道卿

問子留京者胡亦戒遽征告言將辭汝恨恨難為情亦
知終遠別且復稍同行行行並馬遵長路兩兩開襟叙
衷素日上將中不自知隴危却下無傍顧祇疑郊苑共遨
遊歷遠探幽始一休神爽翻思是送別垂鞭不語但含

愁愁來心亂不能守見說能消惟有酒脫衣慙就黃公
壚却却金鞍繫高柳紛紜吐論各輸心偏袒狂呼齊拍
手海上三山不足求人間萬事寧復有逸興空多苦量
微玉壺小酌持半卮強飲難成千日醉離歌又動兩岐
悲風塵詎料幾時合只得相寬言暫別舉袖未分淚已
零登車欲去神俱越人生聚散比浮萍萍葉猶看結蒂
游豈謂平生吾與子盡逢風漂與波流大道傍邊楊柳
垂何人送客不攀枝愁絲慘葉堪沾袂去後依然風任

吹願子貞心勿如此芳盟常保歲寒期

鳴鴈篇

寄陳約之太史兼呈唐應德陳允和二兄約
之賦予南竄為上林鴈之詩予感其意適見
斯鳥遂成短章因以為報云耳

寒空歷歷夜星稀旅鴈酸嘶何處歸霜清露白聞聲急
河廣江上恨力微本謂候時依煖去何言中路失羣飛
羣飛超忽闕山迴祇抱離心獨耿耿每向天邊泣字文

却從月下疑方影孤鳴如和隴頭唸單樓不殊澤畔醒
遷客飄搖靡定居麤麤雨雪賦其虛此時遙聽人何似
避地翻傷鳥不如回首瑤池霄漢傍頽頽玉羽泛清涼
南北欲知悲喜地但看風失與雲翔

聽琴篇

客有善鼓琴者為予操屈原之曲感不自勝
因以成詠

昔傳子春技彈絲聖人耳一曲作人情七絃發妙理美

人攜琴升我床開心敏手亦如此弄奇赴會若有神朱
繩玉軫臨風倚始作懷沙縱九歌却調哀郢傷千里卑
張應節發清商促越更趨引流徵楚水看流撒指間江
風忽奏揮絃裏棲鳥知聲中夜翔潛魚激響凌波起四
郊隕葉紛紛下浮雲辭天月在野瑤徽半拂復中操宮
聲少間羽聲寫山鬼依微薜荔裳宓妃窈窕螭駕舊
聞騷些已潛潛對此離憂遂不堪本聽幽音容易感復
兼放迹自曾諳誇志千秋同夏沔愁心一夕到湘潭恨

恨懷荃零淚雨沾襟不為雍門談

河上遇風

齊郊烈烈大風起走石揚塵一萬里始見蓬蓬生北海
忽簸三江振東岱乍似軍裝赴敵場旋疑天馬奮龍驤
鳴籟颼颼四野聞愁雲晦翳一朝昏能吹朔雪凍寒空
更逐飛沙卷斷蓬飛廉鼓怒陽侯出萬舶千艘靜不發
餘皇玉軸彩蜺翻橫海瑇旖翠蛟掣中流激勢水增波
岸上但呼無渡河桂柁蘭漿徒悵望河深難濟欲如何

將至東昌寄寇太守未菴兼柬包蒙泉節推

旅客羈傷憑寓目東濟榮河漸衍沃禮樂猶存魯國風
魚豢本負齊氓俗專城太守舊懷思佐理包何新相知
遙憐比璧光輝地正是雙刀宰割時故人相別經五春
臨當再見反傷神預恐風波易睽闕况陳委曲重酸辛
以茲盈盈數里間將前還却轉愁人寄語風流賢五馬
行春暫輟一娛賓

清源別張近溪侍御賦贈

君才磊磊稱時英山東七郡蚤知名才雄本自宜高薦
况是明時矜豪彥胡為一棄便沉淪有似驂騑樓畝畔
憶昨乘驄遊宛洛驕嘶被顧待丹轂途間遙認五花毛
臺裏合推千里足仰揖群公盡整纓平交七貴爭酬玉
可憐光寵不相待世事悠悠須臾改今日面情昔不同
昔時歡結今何在浮沉薄俗難重陳骭髀壯懷勿用悔
鬢上漸生白雪霜手中且有黃金壘但聽悲傷歌北邙
便輕偏側蹈東海

贈張東沙臨清兵備

憶昔相逢傷草草如今再見忻懷抱坐來祇是玉山凝
立談便託金蘭好君年方壯已高位鬢髮如雲施綠黛
朝日輝光照綬衣外臺意氣從軒蓋諸侯列郡望風裁
將校分營備皂臺高牙獵獵朱旗建潭府森森畫戟開
治兵能訓常多暇出衆英才稱大雅雖然授節統軍容
却擅落毫增紙價七言破的罷彎弧五采文成纔調馬
對座芳香振蕙襟垂帷紛郁極書林共言為政兼儒術

復有尋仙出世心莫用酬君慚楚璧幸須惠我比南金

沛公歌

沛公尺劍應金符指顧便成大丈夫誅項滅秦若風雨
定都列壤成規模橫行海內已威加反過粉榆駐翠華
戎服七年歸故里瑤圖六合化為家連營繚繞雜帷宮
喧引傳觀井閑空爭看今日炎精帝乃是當時隆準公
始識好施非落魄誰言亡命有成功小往大來矜得志
感今懷昔張高會拆牲醢酒象川丘考鼓撞鐘震天地

金匱要略卷二
泗亭舊長親掃除邑社健兒俯伏拜白衣且盡故人懽
黃屋亦知天子貴非徒寬法滌秦餘更普殊恩洽里閭
錫爵分榮千級羨優施賜復百年除地轉天旋回警蹕
沛上父老皆如失已戴鴻私振萬春難留龍馭更一日
壯心慷慨悲還喜大風飛揚帝歌起千人齊唱萬人和
蜚聲翻入彩雲裏旭日祁祁照四方本從暘谷發輝光
六龍整駕中天去此地猶能戀太陽

過彭城作

陀靡郊原極望平
踟躕立馬客心驚
疎墩蕪沒項王國
煙草淒迷亞父城
春去秋來經幾度
霸業雄圖不可覩
臺在已無戲馬人
灘流猶記敗軍處
高陵深谷在翻覆
世事回還難定測
昔日東歸着錦衣
令人但見繁蒿棘
蕭壘陰陰苦霧封
桓山烈烈動悲風
英雄百戰終歸盡
轉覺身名祇夢中

藏書萬卷樓歌為維揚葛子東賦

廣陵葛子真磊落
大笑時人寶珠玉
先世遺金盡買書

舊藏祇與韋編博善藏選地起高樓樓上陳施盈萬軸
錯置方隅皆滿床臚分甲乙為題櫝趙卿如見應驚歎
楚史多知猶未讀開牖晴朝雲色鮮垂帷深夜藜光燭
已看收拾遍人間更說討論窮士族漢室古文壞壁餘
晉代穿塋出竹書學士睢盱嗟未覩儒生誦守愧空虛
何言散失千年後獨在君家完古初

南京正月十五夜歌

貞寅當夏建獻歲屬秦正物候知陽長風光見太平太

平歌舞早春天正是月華三五圓初晴宿雨山川麗乍
拂和風草木鮮元夕燈火耀焜煌山川草木借輝光抽
英錯采皆新製競巧矜妍各擅場萬戶千門綴列星三
條七市爛縱橫燭熠九微金作椀瞬瞞五色錦為棚却
見明河流下地真教皎月讓華燈燃春火樹紛無數臨
水樓臺映幾層連驂方軫動如雷已拚暮出曙翻迴盡
着綺羅邀月住競將絲管喚花開並攜穠李輕車去暗
度芳蘭接袂來蹴踏泥途成繡埒喧闐石路漲紅埃宛

轉西橋復南陌冶意艷情歡不足少年場上鬪豪奢公
子羣中爭結束博戲千回土比錢妖淫百態人如玉彩
雲飛過迥看粧香霧微傳遙辨曲別有高門與深院帶
障橫施簾半捲晉室風流王謝家漢廷驕貴金張館靚
姝鳴瑟洞房清上客綴珠茵坐滿徧持絳蠟代薪樵覆
引長江添酒瓊舊京繁盛一翻新年年行樂帝城春合
聲願借更籌緩游宴只愁清夜晨沉沉清夜樂耽耽桂
輪西墮日東含北斗城中洛陽道遊人思殺是江南

春晴出遊永寧寺同顧東橋陳石亭羅印岡三

公作

金陵自昔多才雄聲名今日數三公前賢千載見標格
雅道一旦振頽風往往結遊方駕出盡言都邑為之空
才宜大用身未衰謝榮茂世如脫遺懼趣不令兒輩覺
幽盟每共高僧期二毛從他玄鬢改兩屐長使青山隨
翻嗤往古無達者苦欲留名身後知何況金錢與簪組
纏牽糞穢夫何為將棊賭墅不清曠攜妓登山非放浪

祇好玄言與新詩形骸各殊同所尚春半江城猶滯陰
出門不樂愁人心青天歛霞雲散雨特與大士抒煩襟
亭臯開霽迎飛蓋林麓獻春非一態長江靜浪助澄心
列岫爭超不敢背草木向人如有情輝光眼見當筵倍
舉手揮雲便退飛送目不着微陰碍長歌招鶴鶴下來
把酒酬花花為開松濤鳴籟當鼓瑟嬌鶯度曲勸行杯
壯懷俯仰悲今昔此地曾經玉作臺風流同調不同日
嘗聞謝尚邀彥伯當時人人畏少年却延狂生為上客

竹林蕪沒三逕荒留與後人尋今蹟

靈雪篇上湛甘泉費鍾石二公時久無雪禮部

祈雪雪降

江靜復川明榮光滿帝京是日年祥發皚皚飛素雪
繽紛素雪應祈興慘淡玄陰萬里凝瑟瑟初看先集霰峨
峨旋見已成冰輕飛急灑亂霏霏楚水吳山尤自宜大
路樓臺爭改色層城宮闕轉生姿翻時似浣紅塵陌舞
處偏迷白玉墀凌空遙曳雜風飄委谷填丘積不消昔

望兼時將度歲今看合夜并連朝為慶經冬方入地誰
言上世不封條觀瑞懽歌何所致春卿秉禮崇禋祀同
雲聚景禱前生赤日韜光齋後避共言六律失天司賴
有秩宗能感帝秩宗美德合純精並操聯輝雪比清姑
聖相逢曾問道海神出見盡知名如鹽持調商家鼎願
糝梅實作和羹

送文壽承還姑蘇

聞子扁舟將遠適令我幽居心不懌豈無白下諸貴遊

不及吳門一佳客斗酒相逢何草草不語但持歸去好
挾策恥為三上書拂衣欲就五湖老江湖春漲桃花水
一路烟波通故里到處難辭解榻迎及家好是秋風起
送儀部二寅長充選送貴嬪使

春風澹蕩江如綺樓船一道通易水近川花柳盡容華
為過佳人若桃李節旄前路光輝擁受詔採擇復充送
合相當知偃月形問祥應有懷日夢君王正在栢梁臺
歡進千年紫玉杯太史占天先入奏二星遙扈四星來

松江莫生遠來見訪比歸賦贈

文采翩翩正少年機雲以後又生賢已見馳聲嵩洛下
却來又眺楚江邊扁舟泊近西淮柳客舍時沾南市酒
路菓紛投駿馬前山衣寄喚新鶯後風流絕世美何如
一片瑤枝出樹初畫舫夜吟令客駐練裙畫卧有人書
敝刺蒙茸懷袖裏入門相訪眉間喜非才遠謝漢中郎
率爾為君行倒屣

告中送顧儀部伯從僉憲齊東因柬臬臺二三

故人

江雲橫雨暗春天萬戶朝開凝碧烟
行子出門何意氣輝光馬上揖金鞭
白門楊柳風吹發荏苒柔條不受折
雨餘帶濕如沾淚總為遊人傷離別
春愁何處最關情多病思鄉失友生
草色芊眠迷大路川原迢遞阻嚴程
遙知稷下非談辯不記墻東隱姓名

送吳文選純叔歸養乃父閣老白樓公

相門才子勝前章一日思親千里歸
不隨禁闥鴈鴻侶

翻逐吳門鳥鳥飛，傾都冠蓋悵追扳。
陌上征人盡羨還，遠岫停雲看正白。
飄花點袖喜成斑，芝蘭會悅桑榆景。
高堂晝日偏能永，魚美來從舊乞湖。
尊香侍進經調鼎，行樂江山橋梓春。
脩然老少離風塵，紛紛世上多父子。
得似君家有幾人。

春日同李司業愚谷劉刑部範東宴陳太僕石
亭馬通政西玄于顧中丞東橋之瞻辰堂兼
送蔣南冷太僕渡江

三月江城桃李華
陰陰楊柳綠藏鴉
懷春正少淹留處
卜夜無過大隱家
大隱城中不上關
忘形取醉禁言還
簪合應占星是德
顏顏好似玉為山
一堂賓主盡風流
奉壽千金白璧酬
蘭室香兼清論發
花枝色上勸杯浮
繁絃急柱催深酌
雅調離聲相間作
他日席上無車公
縱有琴尊知不樂

送謝應午侍御還朝

秦淮水上石頭城
楊柳枝繁暗轉鶯
正寵輝光休故里

無那夙夜念王程出門抗手凜生風錦綺江山離恨中
衣上落花來點繡波間飛鷁為驚驄今時侍從似君稀
衆望應言赴闕遲中臺盡待將輪揜左个深嘉橐筆隨
明世行藏各自安非才欲進也知難歸耕已製芙蓉服
獨立遙看獬豸冠

題謝御史所藏水仙花障子是徐子仁所寫

二月春猶寒名花不得看何意冰玉姿生君屏障間徐
生善藝為時絕圖黃點白意中設幾人入室誤聞香滿

座尋芳將向折可憐花貌類仙人更詫妙工能寫真綠
葉無風長不動幽英含氣四時新覆朵雲來行雨前結
根石是浣沙年丹青粉黛俱難別但道相逢洛水邊

李司業見遺廬山諸作述懷奉柬

嘗慕當年李謫仙謫仙新詩解倒懸獨在人羣無所好
塵埃回首傷懷抱憂來祇恐白髮先有時夢入南康道
羨君盤游窮妙真覽君詞句何清新莫言今古不相接
今見前賢讓後人

送嚴介溪冢宰考績入覲

建章朝謁曉蹌蹌天子垂衣正萬方
勅引鴻臚宣特進留省尚書來展覲
重瞳日月屢回看兩班文武盡榮觀
奏記不須書手版承恩再贊拜朝冠
三年居守有功勲宴勞親聞便殿言
絳纁聽階知舊履尚方出守副新尊
明良會合似今稀天上委蛇幾日歸
北闕正宜操斗柄東人空自望裳衣

澠池歌

七雄割據相併吞一為橫散一從親從主
鷄連交戴趙衡言虎視獨推秦
遊士東馳劍屬環行人西使車方軌
約為好會兩國歡道里中分期澠水
折俎如山酒滿池談笑尊前釁孽起
霸氣猶尋奪璧仇爭心更抱鼓琴恥
相如按劍奮中酒拍叱雄秦如畜狗
秦固關中二百雄趙亦山東六龍首
金城甲卒不足憑頸血濺衣翻覆手
捧盤請擊為西聲片語生風才脫口
秦王遜謝稱寡人擊缶逡巡惟恐後
滿壇將相驚相顧失色喪精皆反走

歸來數歲閉函關強趙有人未可取

李伯材出示所藏沈石田畫鷄戲題奉贈

恠底丹青含象變幻出翰音棲匹練距設微黃如介金
毛施五采雲錦爛令人白日誤蒼蠅不見明星將舞劍
此物雖微德非一紛紛家畜安能匹開心不狎鷺驚喧
潔性寧謀蟲蟻食主人懷德何所似風雨瀟瀟鳴不已
待唱曾充上國賓含香獨擅中朝美邇來抱朴學雌伏
虛驕氣盡形如木豪華已厭俠場鬪凶吉羞憑蠻風卜

茅堂壁立獨懸之形神相得長昏夙

江州陳兵憲公招飲演武臺軍中奏樂作橫吹

曲舉坐聞之莫不心壯予本懦夫激而為詩

諸水流天險茲邦據上游清時偃兵甲下秩叨燕遊臺
榭敞高原遙臨芳物繁殘花飛廣陌垂柳靜棘門棘門
春色四山通置酒憑春賞未窮衆樂雜陳極窈窕忽驚
橫吹滿軍中浮雲遽離高空去草木飄颻江起風急語
蕭條聞出塞大聲振動作平戎一堂壯士皆怒目書生

撫席亦填胸曲半拂衣投筯起雄心橫發不能終

題畫四首

平溪如席淡不流返照入水水光浮清暉細動蘼蕪岸
香氣遙聞杜若洲木葉微脫丹崖爽漁唱時來草閣幽
虛無剡曲芳蘭夕彷彿湘潭斑竹秋書卷軒窗臨欲暮
為愛清涼忘歸去

繡壁峻嶒森恠立虬松夭矯相攫執脩髯怒甲爭奮躍
洒淅疑乘風雨入蔦蘿蒙密晝長陰雲氣淋漓晴亦濕

複磴兼藏嵌竇深空林恍聽翻濤急在谷幽人不可招
白日此中容易匿

深林幾百轉碧樹層層開繁陰幽黯處往往聲喧厖掛
泉拖匹練忽縮復陡見樛枝礙白雨噴擊如飛霰蒼苔
徑滑陰厓悄烟際淒迷行人小疎簾曲几半埋雲坐覺
冥心淒物表

和風稍吹衣杖策散緩步藏舸識迴汀懸橋知遠渡柳
外風映霞隄邊草侵路陂塘隨地廣野色過成趣越水

千名說鑑湖凌波虎阜勝吳都依稀似向圖中見不是
江南此景無

題便面小景

手中素幅不盈咫風水淒迷千萬里遙出層岑毫末間
稍分斷岸微茫裏雲在青天長不卷烟光乍起看還遠
照影匡廬壘嶂開蒼蒼彭蠡蒹葭晚曾因為吏客江舟
日日長江門外流開圖彷彿如在眼使我遐意凌滄洲
送徐山人還貴溪兼柬江午坡先生

徐生之來江公所遣也午坡盛稱徐生之術
而予不能知獨愛徐生之為人因與之遊比
歸為賦七言長詩三十句午坡頗溺堪輿之
學故末以為諷

幽憂抱疾衡門裏陋巷單棲枯槁士絕無好事致朋來
何處飄飄遠遊子面上驚看烟水容口中愛說山川理
踈進玉盤雙鯉魚中有一尺故人書故人久擅青囊業
却謂徐生我不如每接言談聞要妙欲傳心法恨空虛

浩蕩流波山崩劣徜徉攜手日探陟飢來舉火石頭餐
倦後橫肱林下息水若紛披怨狀窮山精逃遁知情得
極目鄉關去路賒登高遙指亂峰遮已是閑雲長出岫
忽見春風翻念家馬足行隨闕地草鷄鳴夢到楚天花
傳心無侶但空還用盡腰間沽酒錢歸見故人論作客
首應問我索居篇為言平子善風術何似揚雄獨草玄

送俞虛江守備汀漳

黑面趨拳少有髭平生自許一男兒腰間寶鞘龍泉動

匣裏奇韜鬼谷窺直向大師談節制誓將微命奮偏裨
論兵慷慨推黃石獻計昂藏伏赤墀九重覽奏頗嗟異
七貴傳聞爭致遺共恠南人諳戰陣復驚勇士識書詩
授綬金殿承恩出躍馬沙場效死馳曾把陰謀干將略
更抽橐鞬解重圍好親險阨行邊界每望煙烽逐敵騎
未快雄心滅北狄還膺大旆鎮東夷營開百粵雲橫帳
成壓千山鳥度陴堠嶺天寒游激肅軍城月靜鼓加悲
講戎當使同蛇擊羣盜真看似獸獮劈畫岡巒成壁壘

指揮草木變旌旗，英威未說封侯志。
感激須酬國士知。
題月中丹桂圖

生綃半幅吳霜冷，拂盡微塵秋水淨。
展向高堂驟駭神，忽覩青天墮飛鏡。
矚霍瑤光初出奩，四壁澄瑩搖不定。
輾輪乍見海中行，濯魄真看地底迸。
金波千頃浸玻瓈，銀漢一泓垂素綆。
結質團圞亦不虧，佳期三五四時正。
中有輪囷一樹木，布葉歲蕤柯詰曲。
扶疎礙景小霏微，旖旎漏明頻照燭。
根折只容顧兔藏，枝繁獨覆姮娥宿。

飄英落葉細生姿一一黃金散為粟
蕭森影裏似聞香的
燦光中遥辨綠書棟雕楹結綺簷
坐來渾是在虛涵
白日都迷羲伯馭闌宵底用燭龍
銜清輝鑒人毛髮豎
仙芬染斷體膚凡
廣寒不覺身曾到
蟾宮虛疑手可探
世聞墨妙有如此
題句聊為未見談

伯母顏孺人七十壽

歲在戊申月逢七由朔至十加二日
吾家華堂敞高筵
平旦訢訢孫子集
杯盤紛錯具旨珍
人各有持供其職

羅跪再拜次第陳奉充孺人腹中實一觴一箸和氣蒸
歡溢堂除難具悉從子慎中前致詞今年孺人年七十
齒堅腹健頭髮蒼炯炯兩眸如點漆懿慈本自協天休
以德召祥理可必嘉慶請從今歲始遐齡長駐蒼山色
歲歲來陳此日觴孺人不老從子奎

訪吳泉賓先生山居失路

曾識高人棲隱處碧林斜帶芳村路本期屢訪恣遊盤
不謂今來重迷誤野橋橫圯亂行潦疎林鳴蟬秋欲老

始躡鶴蹤半沒泥却尋樵徑時埋草非關涉歷記途差
自是幽貞隔世涯賴有山前新漲水微紅流出礪中花

翁贊畫思誠從元戎張淨峰公西征武陵蠻

壯夫怒眦仰天號咆哮驚走兒女曹隆腫自矜領下肉
昂藏屢盼手中刀居常樂禍占星氣出門正值太白高
馬首裝成酬恩顧戚戚關山遙即路鳶影站波江沸湯
銅標表界天撐柱慷慨身過頭痛溪入險欲覓功成處
凱旋揚旆向城闕長安道上笳聲發人生得意此最歡

取印封侯猶細屑策勲莫恠狗功卑縱指元因漢一傑
病中同年江于春見訪喜而有感

蒙翳城西開一室主人況復長衰疾商歌欲出聲不揚
舉足將行脛無力賓位坐使苔蘚侵阼階漸向蓬蒿沒
兒扶跼蹐為爾興知爾元非車馬客我今已見貌如翁
恠爾猶能鬢似漆朽廢本令顏色醜光輝應為意氣得
告言數歲滯風塵跼足低頭常偪側赤驥引衡鹽滿箱
雕鷹在籠鍛六翮手扳遂巡效趨走壯志推藏誰復識

清濁未容與世昏見人每露眼中白時事蒼茫心死灰
胡為錯驚毛髮黑爾曹困頓不自煎內韃外韃形體澤
我病雖憊神來守俗目徒看柴骨瘠微爾何由覩德機
豈謂泥塗皆棄物大樽浮湖亦有用枋榆飛鸚真堪適
投杖逍遙遂縱歌主人不病何須策

送江少峯年兄兼寄江貞齋學士及午坡提學
窮年易感復多悲却向尊前對別離遶郭青山日欲暮
嚴風錦樹歲將辭人情乖錯今可見陵谷深危起當面

鑊鉞為鈍鉛刀銛猶蕙同歲朱紫亂高才尚爾困塵勞
鄙夫豈悔長貧賤書成本待副名山舌在猶堪叩險關
鐘鼎可銘聊晚取竹素游園非徒閒窮達雖殊各有用
寧須慘戚凋朱顏白雲飄浮飛鳥舉倏忽之并難久聚
十年晤合始如今斯須立談又當去有酒未傾意自酸
況憶杯中舊儔侶金門學士躋譏點繡服儒臣遭中傷
寂寂魚書常不達輝輝棣萼遠相望君歸為向二難說
親見尸公鷄滿鄉

小樓閒望酬邱少泉見寄

鄙夫元是一慵者晨起櫛巾猶不把外戶長闕謝往來
小樓曠望任疎野山形迫若几前生江水遙如窻際瀉
樹木搖落霜氣中簷甍虧蔽青天下北睇千峯通鳥路
岡巒連亘莽迴互直看烟靄渺迷間知是故人樓隱處
寓目本為蕩情志却因懷人結幽思正同槁木無起予
忽枉璫瑰逢來使

山遊晚宿石室遲洪芳洲不至

衆壑生烟日欲低探幽力盡尚攀躋松風數里聽海湧
徑盤谷轉行屢迷鐘聲出岫遙知處閒鶴引步因尋蹊
修柯鬱鬱閉玄室流水淙淙灌藥畦竹下微塵淨如掃
窻間巧鳥矜善啼奇雲翕輳千般氣恠石峻增百丈梯
住處每留聊自悅可人不在與誰攜丹經誦遍山初夕
綠桂香浮月滿蹊中夜收心偏愛靜平生謀隱此堪棲
行窺石洞逢真髓只恐君來已作泥

題北塢精舍寄贈蔡克銘先生

樗楊蔽戶薜緣牆半塢依微聊可藏
闕牖恥同鑿甕陋覆椽戲作刈茅荒
盆池湛湛偏涵色庭草萋萋自有芳
蟠礴雖無林谷美栖遲也覺壑丘長
主人未識平生意獨抱遺經心力費
沿泝宓姬後與先攻求詰訓同兼異
寧思世上逐繁華尚向齋中勤寤寐
似戀楹軒寡出門頗遭親友嘲忘事
揚雄嗜酒且好書愛君僻性亦復如
蘭罇滿處開絳帙芸篋香邊貯麴車
流俗妄輕何足問襟期遙合每相於
題詩一寫塢中趣不見莫令佳事疎

送裴質齋掌教

東風吹春滿南國陌頭楊柳黃金色祇言佳氣正娛人
何意離尊當送客鄙夫談道泉山陰廣文來講裴興林
林友昨去灘江側君今往適潭水潯不因繾綣難分手
自惜向誰開此口欲別逡巡杯水間送君轉使憶林友
題溪洲別業贈羅生希晦

孤洲宛在水中央中有伊人一草堂四遶波瀾絕徑術
獨開戶牖假滄浪時時雨點霑春卷往往灘聲聒夜床

寂寞垂帷心自適最憐地與人間隔每看草木無俗容
久對鳬鷗盡相識霧裏豹藏已澤文鰈中鵠養將成翮
撲几繁香杜若秋侵裳濕氣素烟浮晶熒曾照香藜火
搖曳嘗親桂樹舟白露霜時段莢勁思君徒欲泝清流

觀詹範川大書歌

詹侯清晨登我堂手攜大軸墨淋浪直木屈鐵相撐拄
展舒未畢神開張猛虎崢嶸龍爪利左擎右攬思復翔
一波如拳勒盈尺豎戈擎趯掣電光瑠瑰側剉金斜鑿

銳鋒斫劍星耀芒華嵩擲石壓虎窟衡霍興雲起蛟鄉
冒雪紛披驚變態一手真看百體藏如知冒含山海氣
鬱勃憤盈不可當細書瑣屑何由泄故作大畫森橫床
激射幽陰竦毛髮妍姿宛轉迴春陽想見迴腕乍伸縮
墨池驟涸筆行枉看君筆勢有如此前掩崔杜後張王
數仞高牆連幅縑素不足滿君之塗洒宜治磨崖千丈
壁立摩穹蒼

宴洪鄭川公席上贈歌

我生多病守蓬蒿固陋自知亦自鄙窮年不往富奢招
沉冥坐興時乖舛西第名賓各選英南陌輶輪若馳水
驚座孟公非所長來盜浮沉敢相齒酒肉啜噉真細事
小人徒飽信堪恥世俗本自重徵呼病夫可用見輕毀
登堂今日為公懽斟酌豈謀口腹美長者固然謬好賢
通家烏取文繁侈豆簞正可示嘉慈乃復開筵置清醴
刲羊列俎告積鮮旋結魚留罩魴鱧菰菌流丹每溜匙
雕胡柔滑雜香料手持匕筯勸我嘗當饋屢興辭不止

薄劣猥慙飲食豐
厓羸忽為甘肥起
敬恭百拜飫良溫
側弁僭倣古所試
豈有軒車喑里閭
更無都雅華簪履
聊因杯酌存此風
一使鄉人知酒禮

飲中醉歌題贈李東甲

東甲先生愛靜便
辭官正及未衰年
忘機不賭園棊墅
好飲多開種術田
每誇妙得閑中坐
更詫無如醉後眠
子夜絃歌娛客處
一春風雨養花天
紅英漸委蒼苔上
白雪來侵絲鬢邊
世態無端爭夢裏
人生何事勝樽前

送李邑博望山先生

問君何所望征營復彷彿有時思入重泉下有時魂遊
九天上若滅若沒不可方或有或無難為狀不為攢靄
黛千峯不為停烟青萬嶂只為可仰一高山寢食如遺
心靡他躊躇四顧如有喪朝夕不見魂蕩蕩朝不見山
夕不見山黛峰青嶂千萬般日日在眼前曾不解君顏
朝兮望山夕兮望精神注想他物不能干忽已置身高
山側寧須登頓勞攀援朝也見山夕也見山畔岸氣勢

靜重儀形終日對羹牆間世人愛山只是山如君望山
豈徒然為君題作望山篇留與象郡人間傳

放歌行送將樂張丞

漢室材雄數武皇躬履豐盈海寓康萬戶千門不足御
超然思舉雲中裳桂宮蘭殿營未已更起通天造栢梁
雙擢金莖逼霄漢高高脩掌承天漿蓬萊三山恍可到
燕齊迂恠爭言方神人東岱見巨跡王母西池親捧觴
但得仙靈長不死真棄萬乘如敝屣好方少君前覆車

五利將軍後執軌銅池三秀表奇祥瑞麟天馬來告祉
武安門下多腹心畯良盡集平津邸南陽孔僅故賈人
卜式田間牧豎子自售名見驚嗟晚高議朝堂發唇齒
莫言往代不可攀莫歎微軀難上天虎豹守闕排闥入
探珠須泳睡龍淵堂堂張丞六尺身胡為落落在風塵
意氣揚鞭跨馬去如君豈是沉埋人

題水心漫湖圖

水心居士心如水結廬獨在水中止浮鯨浴鷺與和光

金匱要略卷二
簡帙沉冥妙理枕席長涵烟雨飛蒹葭影拂窻戶裏
四涯望斷絕來徑碧波澹蕩滌氛滓漫湖逸人最清曠
一生浪跡五湖上陶朱曾挾西子遊欲躡奇蹤慕間放
荷葉時穿菱女舟釣絲或偶漁父榜糞土黃金不足營
胸懷坐失具區壯蕭蕭尺幅誰為揮依微遠意出新機
水中之廬湖外柰客來覽素壁不辨是耶非

遵巖集卷二